

國

朝

列

卿

紀

國朝列卿紀卷之五十六

刑部總論

夫刑部尚書者古秋官大司寇之任也秋肅殺萬

寇使掌邦禁所以驅持惡人納於善道也自漢置賊曹典刑獄
以後魏爲都官宋爲比部至隋改爲刑部尚書歷唐宋相沿不
改然劉道貞有云刑獄難精是以賊曹重於諸曹使不能聽聲
觀色以別真僞則亦何貴於明刑也哉我朝設刑部尚書與
六卿秩同班等其選並不輕授求其敬爾由獄不愧明允之稱
者若軒鹿邑雄挺清節不爲曹石侵官何文肅拒絕請托不容
官校妄捕彭惠安因事納忠剴切時弊與夫安遠侯柳景之營

免贓銀內官王苗等之祈免絞罪百戶謝原之踢死隊軍東安
尹朱華之誣差陵戶俱抗議力爭無出無入有以身許國之忠
林見素晚年再起矢輔新政首乞親近儒臣次論謹守初詔與
夫太監崔文之需索夫錢校尉李陽鳳之科歛匠物寧違詔不
敢廢法有犯顏敢諫之節李康惠叅訂要結不以文法嫌怨自
阻而上疏論時事莫非軍國大計胡端敏抗論剛聰不宜羅織
驚衆而申雪陳九疇人皆以中流砥柱稱之是數公者原情比
律不失惟良折獄而平生節操言言可畏而仰者獨典刑焉已
哉其餘自勵才猷行多矜恕雖責之全德容有未盡較之渠儉
宿狡爲張湯郅都之士直者皆非諸公所懷也而况 聖恩浩

蕩執敢誘之爲酷耶宋李焯有云奏讞之弊失於案牘稠疊舞
文巧詆者容乎其間而不加辨別噫豈惟宋哉其弊之來也非
一日矣

國朝列卿紀卷之五十六

刑部尚書年表

吳

中

山東武城人監生永樂十四年任二十二年改工部尚書加少師卒贈莊平伯謚榮襄

金

純

直隸泗州人監生永樂二十二年任宣德十年致仕卒贈山陽伯

魏

源

江西建昌人進士宣德十年任正德八年致仕

王

質

直隸秦和人鄉舉正統八年任九年失囚左遷

金

濂

直隸山陽人進士正統九年任十四年遷戶部尚書加太子太保卒贈沐陽伯謚榮襄

俞

士悅

直隸長洲人進士正統十四年任加太子太保天順元年謫戍遼東

軒

輓

河南鹿邑人進士天順元年任本年致仕起左都

劉

廣衡

江西萬安人進士天順元年任本年致仕

陸瑜 浙江鄞縣人進士天順二年任成化八年致仕

王槩 江西廬陵人進士成化九年任十年卒諡恭毅

項忠 浙江嘉善人進士成化十年任本年改兵部尚書加太子太保卒諡襄毅

董方 順天灤縣人進士成化十一年任十年致仕卒贈太子太保諡襄敏

林聰 福建寧德人進士成化十三年任加太子少保十九年致仕卒贈少保諡莊敏

張鎔 直隸華亭人進士成化十九年任二十一年致仕卒贈太子少保諡莊敏

杜銘 四川金堂人進士成化二十二年任二十三年致仕

何喬新 江西廣昌人進士成化二十三年任弘治五年致仕

彭韶 福建莆田人進士弘治五年任六年致仕卒贈太子少保諡惠安

白昂 直隸武進人進士弘治六年任加至太子太傅十三年致仕卒贈太保諡康懿

閔珪

浙江烏程人進士弘治十三年任加至少保正德二年致仕卒贈太保謚莊懿

屠勳

浙江平湖人進士正德二年任加太子太保三年致仕卒贈太保謚康僖

王鑑之

浙江山陰人進士正德三年任四年致仕

洪鍾

浙江錢塘人進士正德四年任本年改左都御史加太子少保卒謚襄惠

劉璟

河南鄆陵人進士正德四年任加太子少保六年致仕

何鑑

浙江新昌人進士正德六年任本年加兵部尚書

張子麟

直隸藁城人進士正德七年任加太子太保十六年丁憂

林俊

福建莆田人進士正德十六年任加太子太保嘉靖二年閑住

金獻民

四川綿州人進士嘉靖二年任本年改兵部尚書

趙鑑

山東壽光人進士嘉靖三年任五年致仕卒贈太子太保謚康敏

顏頤壽

湖廣巴陵人進士嘉靖五年任六年闕任

李承勛

湖廣嘉魚人進士嘉靖六年任本年改兵部尚書加太子太保卒贈少保諡康惠

胡世寧

浙江仁和人進士嘉靖六年任七年改兵部尚書加太子太保卒贈少保諡端敏

高友璣

浙江樂清人進士嘉靖七年任八年闕任贈太子少保諡襄簡

周倫

直隸崑山人進士嘉靖八年任本年調南京刑部尚書

許瓚

河南靈寶人進士嘉靖八年任十年改戶部歷內閣少保文淵閣大學士

王時中

山東黃縣人進士嘉靖十年任加太子少保十一年致仕

聶賢

四川長壽人進士歷都察院左都御史闕任嘉靖十二年起任十四年致仕卒贈太子少保諡恭襄

唐龍

浙江蘭谿人進士嘉靖十五年任十七年終養後起至太子太保吏部尚書

楊志學

彭城衛籍湖廣長沙人弘治癸丑進士嘉靖十七年任十八年致仕卒贈太子太保諡康惠

周期雍

江西寧州人正德戊辰進士嘉靖十八年任十九年致仕

錢如京

直隸桐城人弘治壬戌進士嘉靖十九年任二十年致仕卒贈太子少保

吳山

直隸吳江人正德戊辰進士嘉靖二十年任二十一年爲民

聞淵

浙江鄞縣人弘治乙丑進士嘉靖二十一年任二十六年遷吏部尚書加太子太保

屠僑

浙江鄞縣人正德辛未進士嘉靖二十六年任本年改左都御史加太子太保

喻茂堅

四川榮昌人正德辛未進士嘉靖二十六年任二十八年以病致仕

劉訃

河南鄆陵人本部尚書璟子正德丁丑進士嘉靖二十八年任本年爲民

李士翺

山東長清人嘉靖癸未進士二十九年任本年改戶部尚書

顧應祥

浙江長興人弘治乙丑進士嘉靖二十九年任三十年調南京刑部

萬鏜

江西進賢人弘治乙丑進士嘉靖三十年任本年遷吏部尚書

應大猷 浙江仙居人 正德甲戌進士 嘉靖三十年任

何鰲 浙江山陰人 正德丁丑進士 嘉靖三十一年任 三十五年致仕

歐陽必進 江西安福人 正德丁丑進士 嘉靖三十五年任 三十六年改工部

賈應春 直隸真定人 嘉靖癸未進士 三十八年任 三十八年改戶部

鄭曉 浙江海鹽人 嘉靖癸未進士 三十八年任 三十九年回籍

潘恩 直隸上海人 嘉靖癸未進士 三十九年任

閔煦 直隸任丘人 嘉靖乙未進士 四十年任 本年丁憂

馮天馭 湖廣蘄州人 嘉靖乙未進士 四十年任 本年閑任

蔡雲程 浙江臨海人 嘉靖己丑進士 四十一年 丁母憂

張永明 浙江烏程人 嘉靖乙未進士 四十一年任 改都察院左都御史

黃光昇

福建晉江人嘉靖己丑進士
四十一年任隆慶元年致仕

毛愷

浙江江山人嘉靖乙未進士隆
慶元年推二年任四年致仕

葛守禮

山東德平人嘉靖己丑進士
隆慶四年起任改左都御史

劉自強

河南扶溝人嘉靖甲辰進士
隆慶四年任六年致仕

王之誥

湖廣石首人嘉靖甲辰進士
隆慶六年任萬曆二年終養

王崇古

山西蒲州人嘉靖辛丑進士
萬曆三年任五年遷兵部

劉應節

山東濰縣人嘉靖丁未進士
萬曆五年任本年罷

吳伯朋

浙江義烏人嘉靖丁未進士
萬曆五年任六年卒

嚴清

浙江嘉興人嘉靖甲辰進士
萬曆六年任十年改吏部

潘季馴

浙江烏程人嘉靖庚戌進士
萬曆十一年以太子少保任

舒化

江西臨川人嘉靖己未進士
萬曆十三年任十五年養病

李世達

陝西涇陽人嘉靖丙辰進士萬曆十
五年任十八年轉都察院左都御史

刑部尚書行實

吳中字司正山東武城縣人洪武戊寅自國子生授管州後屯衛經歷陞大寧都司經歷成祖師至大寧中以衆出迎上

一見拔於羣衆中命守會州教士卒力田南兵攻城率衆卻之移守薊州捍禦撫綏具有方略賜衣服器物以嘉獎之遂命署北平布政司理問尋陞本司經歷給饗運贊城守並効勞績

成祖改元永樂以功陞大理寺丞是歲旱蝗具言此由刑濫所致皆臣等之過乞戒飭法司務寬平無幾陞少卿以發奸慝陞都察院右都御史五年將營北京殿改工部尚書奉命取材於

蜀還又命董餉運北京八年車駕北征命扈從兼督餉運

十二年還京丁內艱歸十四年奪情起復仍命董管繕中言營繕吉事臣喪服未除非所當預改刑部尚書十九年以言事忤旨逮繫二十二年仁宗皇帝嗣位釋復職尤見信任陞太子少保仍掌刑部尚書兼詹事府事賜寶帶金織衣在刑部寬厚仁恕恒躬視獄中命除穢惡疏桎梏時食飲戒飭吏卒以時寬恤未幾仍改工部尚書餘詳工部

金純字德修直隸鳳陽府泗州人洪武中歲貢入大學需用三十二年吏部尚書杜澤愛其才薦擢吏部文選司郎中持衡公平能聲益著三十一年出陞江西右叅政值久雨江水總濫民多勞饑多方賑恤民賴全活壬午成祖入正大統吏部尚書

義首薦之召爲刑部右侍郎永樂初將營北京命往湖廣採大木規畫綜計惟恐耗竭國脉務禁奸貪侵漁於是各郡不聞騷擾之苦而事亦易集還京甚荷成祖眷注七年車駕巡狩北京特命扈從及八年北征又命純同學士胡廣諭德楊榮金幼孜扈從三月車駕蚤發凌霄峰純等四人失道上命中官傳旨追尋得之上大喜慰問良久五月至驢駒河稍逼賊境凡居中翊贊効勞居多胡寇平扈還南京尋陞刑部左侍郎九年命看視河勢先是洪武元年太祖高皇帝用兵梁晉間使大將軍徐達開塌場口入於泗以通運道後因河口壅淤乃修師家莊石佛諸閘又開濟寧州西耐牢坡接引曹鄆黃河水以

通梁音之粟後故道復塞至是命純發河南運木丁夫開濟故道自開封城北引水下達鄆城復入魚臺塌場口出穀亭北十里以修 太祖時故事今所謂永通廣運二閘是也十年回京十四年改禮部左侍郎尋陞禮部尚書時禮部有呂震掌部事凡一切大典禮慶冊祭禱等儀俱命純攝行之十五年又扈巡北京於行在諸典制俱諳習切中事宜十六年扈還南京十八年又扈從行在十九年定鼎北京奉 勅巡撫四川地方考察官吏安輯軍民於蠹害地方者惟去其大甚不毛舉細索蜀人無擾及事竣還京與尚書呂震協理部事雖震有柔佞才而純以誠心處之終無間阻二十二年改工部尚書本年冬改行在

刑部書時于文甫息法網疎闊天下乂安號稱無事純亦比
情字律務存寬厚嘗建言刑法因言監生有犯公罪紀錄其私
罪當笞者罰贖歷刑一年依例考用從其議更令詳審之勿爲
深刻又大理卿胡槩奏應天府上元江寧二縣耆民言今國子
監闕膳夫取役二縣之民差役頻繁兼有趣辦力不能堪請如
洪武中事例以應天常鎮蘇松等府縣罪囚應管杖徒流者充
役爲便 上曰役有罪以蘇民力亦何不可命行在刑部斟酌
以聞于是純等奏請令南京刑部都察院諸衙門除偷盜鬪毆
傷人及威逼人至死犯姦依律科斷外其民犯徒流罪者發充
膳夫滿日更替從之每戒屬吏不妄椎擊繩人以故諸司亦習

爲寬厚故獄無逋死者宣德十年致仕卒贈山陽伯雖其立德樹行不昭揭於世而始終受眷遇不衰亦可以知其槩云

魏源字文淵江西南康府建昌縣人永樂乙酉領鄉薦明年取進士拜監察御史所至舉其職松江知府黃子威被誣不能白源爲辯其枉浙東傍海民困於漁課爲奏減之西安大疫民間比屋不能興督有司具醫藥往療全活者甚多涼州有寇將大爲民患源廉得之亟請兵殄除民不得受害父母相繼卒皆奪喪起任職爲御史十九年陞浙江按察司副使宣德五年召還署刑部右侍郎會河南旱饑民轉徙乃命爲河南左布政使至則發倉廩以賑民奏免逋賦省繇役及諸不急之務一以安民

爲事稍稍歸復而雨亦大至六年 召爲刑部左侍郎食從二
品祿或言四川邊務多弛廢命源往理之明罰飭法衆務修舉
事畢還朝十年拜刑部尚書獄無滯囚凡所決斷者人人自以
爲不寃正統二年 上注意邊事命往西邊督察諸將謹防邊
以便宜從事遣都指揮李謙守獨石楊洪副之劾奏指揮杜衡
等慢令當死諸將始憚不敢肆自天城抵朔州視要險地宜守
者凡八分命諸將守之請增修開平龍門城使高大皆甃以甃
庶可守又自獨石抵宣府增置墩堠發開平龍門兵併力爲之
屯軍免其租一年凡諸大城堡請給神銃火藥嚴爲備 上皆
從之再遣勅嘉勞焉時諸軍有勇壯者依託權勢以避役悉摻

括歸伍中權豪側目一弗顧八年病足不能朝遂以此致仕大
六君子皆惜其去而亦莫不以爲榮性忠厚坦亮孝於親友於
兄弟睦於宗族而信於朋友與人言必依於仁義其襟度夷曠
洞見肺腑事有可疑者處之無不愜意凡所蒞人至今譽嘆不
能忘正統九年卒於家壽六十三

王質字



直隸鳳陽府太和縣人永樂甲午由鄉舉授南陽

縣訓導其學甚博於經書子史無不淹涉雖行文稍滯如蜂採
花不能釀蜜而士子資其多聞日有啓迪久之以學行卓異徵
爲監察御史居臺益務清謹凡事無大小俱詳審老成不尚嚴
刻人稱得體宣德中以大臣薦陞四川右叅政在蜀以廉稱出

不食肉惟蔬食而已蜀人呼爲青菜王正統初年陞山東右布政使嚴覈帑藏節浮費清隱蔽所儲蓄大倍於前又使問民瘼恤荒平賦民甚德之六年召爲戶部右侍郎衆論懽然至則清利源塞弊孔而所守皜然如四川山東時八年陞刑部尚書待寮屬嚴厲不假辭色故僚屬不樂未幾以失囚左遷叅政後轉戶部未任卒論者謂其在刑部言行或少變於前而始終清操亦無玷云

金濂字宗瀚直隸山陽縣人性剛果有志操永樂戊戌進士擢監察御史歷都察院右副都御史正統九年陞刑部尚書疏寃理抑獄無淹囚時太監王振竊柄多以意獄人執筆嚴毅不承

望風旨移情就獄故在刑部以明允稱十三年逆盜鄧茂七作亂初遣都督劉聚率兵討之以僉都張楷爲監軍不能成功巡按御史汪澄以擅止浙軍下獄又命太監曹吉祥寧陽侯陳懋保定伯梁瑤平江伯陳豫率大兵討之命濂叅贊軍務至則賊據九龍山同楷等選精兵二千撤其後與衆計曰明日賊必空寨來攻若疾入其寨而反攻之破賊必矣比日賊視我營兵少果至溪上無筏而還一千兵已據其寨用其滾木礮石下殪之賊衆遂降但懋等籍民夫捕賊徒掩爲功次攘里甲招降羣盜輒以捷聞遂各冒陞賞加濂太子賓客未幾賊黨復作御史顧瑄糾劾奉旨宥免十四年戶部尚書王佐死土木之難改濂爲

戶部尚書詳戶部

俞士悅字仕朝直隸蘇州府長洲縣人自幼讀書過目卽成誦
永樂乙未進士擢監察御史十九年陞湖廣按察副使綱紀振
肅貪濁悉自引去民居不戒於火延及臬署僚屬皆奔避士悅
具衣冠向火再拜風徐返火滅歲旱有司用道家法焚蛇瘞燕
而旱彌甚亟命屏去乃齋沐露禱得雨連三日宣德四年秩滿
陞浙江叅政初至佯若不解事者羣吏易之越三日發奸摘伏
如神豪猾破膽正統壬戌倭寇犯境士悅城汴激二浦以備至
今賴之七年陞河南右布政使甫三日 召還陞大理寺卿已
已之變陞右都御史留守 京師協都督衛穎帥師六萬守德

勝安定二門事平陞刑部尚書在刑部依徇權勢不能執守景泰元年春久旱因言者革錦衣官校一日南守備奏南京沿江盜賊蝟起乞行御史錦衣衛巡捕士悅以爲當准擬兵科給事中葉盛曰錦衣官校近已革去當止行御史於是錦衣官校不差三年與易儲加太子太保會吏科給事中林聰劾少保王文銜之值聰鄉人有事吏部應管聰爲囑之文選出其手書文欲寘之死會官廷議擬大臣專權擅選律士悅附文意不敢違賴禮部尚書胡濙以言聞於上聰得不死天順改元下獄謫戍遼東成化元年赦還復其官卒年八十士悅儀表魁岸面色一如鐵聲如洪鐘不類南產平生議論侃侃在院部不聞以剛方

著已已之變懼賊勢令馬船裝送家小財物回家及在院朦朧
奏保平昔交通未及兩考吏役違例除官又性躁未半月人人
鞭朴被都察院吏鄭名奏訐 旨令回話縉紳惜之

軒輓字惟行河南開封府鹿邑縣人永樂甲辰進士天性廉介
初爲進士往淮上催糧時冬寒舟行忽落水卽救出衣盡濕得
一棉被裹之不能出有司急爲製衣一襲却之只待舊衣乾着
之後爲御史獨振水蘖之聲用當道薦爲浙江按察使前使林
實在任一切供給取諸民輓皆罷之俸資之外一毫不取自着
一青布袍無間於四時破則補之蔬食不厭午則燒餅一枚而
已與寮屬約三日以廩易肉一斤數多者亦如此皆不能堪有

臧令回鄉者或故舊公幹經會晤者留供一飯至厚者殺一雞僚屬見驚異此舉不易得也自餘盤肉一味而已忽聞親喪明日就行雖僚屬尚有未知者景泰元年陞右副都御史鎮守浙江會福建賊吳金八等流劫青田等處奏遣布政孫原貞僉事鄺彥舉會勦之尋以憂去五年起復陞南院左副都御史掌院一事兼督南京糧儲清操愈堅張都御史純素侈縱設席會諸僚獨不赴既而以卓食饋之亦不納天順元年大學士李文達公賢薦爲刑部尚書勁節倜儻然不輒撓以太監曹吉祥忠國公石亨等怙權侵官以老疾告上不許付吏部數日召赴文華殿有所問視誠有疾會吏部覆奏始賜休致又明日陞

辭復承召問輓歷陳爲御史爲按察使爲都御史所以 上曰
昔浙江廉使考滿歸家具僅二竹籠是汝乎輓頓首又問年未
老再可用乎輓頓首以疾告 上知不可強乃賜織金綵段二
表裏白金二十兩輓辭卽日就道後四年起左都御史總理南
京糧儲清操益勵成化二年致仕

劉廣衡字克平江西吉安府萬安人永樂庚子領江西鄉薦登
甲辰進士第宣德戊申拜刑部廣東司主事乙卯陞陝西司員
外郎正統丁巳再陞本部浙江司郎中凡歷二署廉明之譽翕
然庚申秋 朝廷軫念四方多罹饑饉欲廣蓄積以禦荒歲乃
簡廷臣分理預備之政 勅以便宜從事而廣衡在首選往浙

江卽日上道遍立郡邑所區畫甚多得粟數百萬石爲四倉以儲之復督勸有司築陂塘抑豪強拯困弊事集而民不擾旣還朝廷嘉之甲子陞陝西按察司副使命專理重刑凡擬獄賴明決者衆甚已巳陞陝西布政司右布政使景泰元年上以陝西邊務方殷陞都察院右副都御史鎮守關中至則感激自效條陳數十事皆安邊禦寇利國安民急務多見施行時邊報多警而從容裁處咸得其肯綮督修城堡七十餘處復奉勅轉輸軍餉數萬石於邊城適歲旱民饑因設法濟之俾不失所而公家之務亦辦尋召還治院事未幾復命往錄南京法司之獄多所平反旣還有白金綵幣之賚至壬申秋復奉命糾察湖廣庶

職之廉貪者凡所黜陟人服其公且條陳軍民利病數事多見
采納既還勞以羊酒時浙江福建民鄭懷胄王孝心等作亂特
勅馳往督兵捕之至則賊已就擒乃察其嘯聚之故以山有銀
場連亘深僻賊得以潛伏其中卽命伐山通道具奏設縣治以
便巡視其患遂息已而守臣以所獲賊屬俱論謀逆報功希賞
乃覈其實得首惡者十人餘悉縱之事竣而還賜白金綵幣甚
厚丙子復奉 勅巡撫遼東提督軍務鎮靜不擾遠近悅服天
順改元春 英廟復位召還陞刑部左侍郎八月遂進齋書屢
膺金帶繡袍之賜時感 上知遇益自力以圖報稱秋九月忽
溝風疾而瘖卽上疏懇乞骸骨 詔許之至天順二年卒年六

十四 上聞訃遣官致祭於其家復 命有司爲營葬事

陸瑜字廷玉浙江寧波府鄞縣人聰悟夙成弱冠登宣德癸丑進士第奉使湖南徵發海艘水手舵工率禮慎法無毫髮註吏議丁繼母憂服闋除刑部山西司主事時郎中仲閔爲之長知瑜爲偉器每舉洪武永樂間法比沿革告之且曰子他日必大用不可不知 國朝舊典故瑜於律例條格多究心及大用每舉仲君之言戒勵屬官及差盤 內帑貨幣勾較精密中官無敢欺隱者遷廣西司員外郎正統九年歲旱 英宗慮天下獄多寃 勅往淮揚蘇松等處十七郡審錄繫囚至則參錯訊務求其情廬州大家僦匠構居室供饋甚薄匠恨之以堅請

丁倒戶絕之說乃以釘插蒜瓣中置於梁間主翁得之執匠訟
府府坐匠魘魅當死瑜言律法造魘符書呪詛者謀殺論插釘
蒜中非符書亦無呪詛不當死坐匠它比其平反多此類諸郡
繫囚得釋者三百餘改從輕者又千餘人大司寇金公濂語察
屬曰陸員外克體 朝廷欽恤之意矣遷貴州司郎中丁父憂
服闋改四川司郎中景泰二年陞山東布政司右叅政使齊東
洊饑貧民相率持杖發富室廩粟前使坐以強劫死者三十六
人瑜曰民苦饑攘粟以延殘喘耳改坐白晝搶奪而三十六人
皆不死河決張湫 朝命僉都御史徐公有貞塞之徐公委督
其役時工匠集者數萬乃爲設方略編荆爲筐實以土石沉而

築之水患遂息尋轉左布政使天順二年冬以李文達公薦徵拜刑部尚書及廷謝英廟見瑜奏對洪暢進退雍容與左右曰刑部得人矣瑜久居法曹練達國家典故凡有大獄屬官不能決者質於瑜則曰某時某所犯類此退索故牘閱之年時無少差時錦衣衛指揮門達怙寵作威弘農衛卒誣指揮李斌與其弟健謀反事下達鞫之達燬鍊以爲反狀已具奏

請會三法司審問衆相顧莫敢異論瑜獨言其寃達怒侵瑜瑜曰法司所執者祖宗之法耳吾何敢捨所執法枉人滅族之罪邪達不從譖其欲出反者上知無它曰彼欲重慎耳及奏上誅止斌兄弟而免其妻子曹欽反武夫希功者執其個人送官

以爲逆黨凡數千人乃從容語都憲李公曰欽之反起於倉卒
佃人相去或數百里安得與謀公柰何使數千人無辜而死并
籍其家耶李以爲然於是佃人皆不坐 上素重瑜或獵近郊
或遊上苑輒召從行禮遇優渥 憲宗初開經筵瑜與羣卿侍
有白金文綺之賜成化三年夏尚書九載滿上疏乞休 上曰
卿才識老成朕方倚任所辭不允復任五年忽感風疾甚劇
上遣中使臨問御醫療疾賜以酒米食物疾少間復乞致仕 上
不允特免朝參仍理部事越兩月疾復作又上疏懇求謝事

上乃許之辭之日 賜寶鈔千貫抵家以泉石詩酒自娛別號鑑
湖後逢 聖慈仁壽太后徽號禮成推恩致仕之老進階榮祿

大夫榮祿階一品非奉 特旨不授蓋殊恩也瑜端亮有容寬
裕有制爲刑部尚書十五年明習法令如漢胡廣而無與世浮
沉之譏屬官賢者禮之如賓有險且暴者馭之甚嚴及其改過
則坦懷待之不追咎其既往人以是德之門達素不合及達敗
言者欲寘之死李文達訪之瑜曰達典制獄任情輕重不可謂
無罪然眎紀綱馬順則有間矣文達然之達卒得不死都御史
寇深暴戾自用每會審罪囚強辨巧詆衆無敢違者瑜徐一言
據理正論深不覺自詘於弘治二年卒壽八十一謚康僖

塵談錄云袁忠徹相術名天下宣德中四明陸司寇瑜方授主
事往領牙牌忠徹以紙裹一牌授之既出展視之其文則刑部

尚書也亟返告公大笑曰非誤異日當懸此耳後果然人益神其術云

王槩字同節江西吉安府廬陵縣人正統壬戌進士授刑部山西司主事歷員外郎進雲南司郎中研習法律根極比例凡同事異情者一一精辨不差毫釐故一時稱爲明法司尚書金公濂俞公士悅多倚重之事干豪勢及幽隱難質者了決無宿案景泰二年以聲望陞湖廣右叅政未幾調河南所在留心民瘼力行荒政得藩牧體六年陞河南按察使令行禁止風清弊絕又聽獄明允民稱不冤天順初被誣逮繫詔獄會襄王入朝英皇以官吏賢否問王首稱槩以對卽日宥還尋陞都

國朝及身系
卷之三十一
察院右副都御史巡撫陝西地方值歲大荒老弱流移檄所司
設法鳩集停逋負定賦額民恃以無恐七年徵爲大理寺卿廷
尉天下平先是刑部都察院獄囚要結多比周成風徒爲文具
不聞駁繳至則測情比律指摘其過誤疵謬不少假借以故諸
法吏相率爲明慎而民不聞以枉死者其所爲斷案繳駁諸法
吏亦轉相抄寫成編至今傳以爲式九年陞槩刑部尚書在部
刑名素練剖決如流又疏陳時政十事 上嘉納焉十年遘疾
卒於官壽五十七謚恭毅

項忠字蓋臣浙江嘉興府嘉善縣人正統壬戌進士授刑部雲
南司主事戊辰陞陝西司員外郎十四年己巳扈從北征羈留

虜中飼馬及還陞山東司郎中累官都察院左都御史成化十
年陞刑部尚書白圭卒大學士商輅薦忠以代詳兵部

董方字仲矩順天灤縣人正統甲子領順天鄉薦連登乙丑進
士第授大理寺評事陞左寺副未幾以都憲蕭惟禎薦陞左寺
正法律精明濟以仁恕以故滯獄沉寃多所伸辯時有巨室被
盜方捕時東阿縣民蔣傑適盜偕行因併執縛傑訥不能辯以
拷掠遂誣服方廉察之乃緩刑訊焉言是夕同宿某家盜賊實
不知證驗皆明遂出傑神策衛軍詐稱錦衣旗樓奉 旨訶事
誑取人財事覺有司以詐傳 詔旨論應死方以彼冒名誑財
耳傳 旨無實跡因得減論金吾衛卒 領銅內局中道竊銅

板尺許遷者得之有司以盜內府物律斬方以物既領出非潛入內府盜者宜以監臨自盜論遂減從徒其諸平反咸若此寺丞劉約之嘗爲述獄錄今行於世景泰乙亥屢災異 朝廷以濫刑爲憂乃 簡廷臣往獄諸處獄方得山西時太原民白政與邑人王選構怨殺之投尸於河事覺政復誣選妻與已通同謀殺既成獄方疑彼爲夫婦三十年生子十餘人安得有此乃盡拘鄉隣質之且以事跡語言反覆嚴驗始得其情政遂服選妻得免天順丁丑陞本寺右寺丞時武人忠國公石亨用事熏灼中外或謂一往見薦楊可立待方抑之曰士貴氣節屈千金軀忍耻以要權貴吾弗爲未幾出其門者果皆敗聞者服之

庚辰曹欽謀逆舉兵焚闕方及同官卿李賓急趣軍士汲汲救
護曹竟不能害賊平李遷左都憲方遷本寺右少卿執法持正
衆論皆平成化乙酉遷刑部右侍郎癸巳侍郎滿九載遷都察
院右都御史理本院事甲午 上以大同西北重鎮撫巡非人
爲憂詢於衆遂推方往許節制諸軍事至則飭官吏謹備禦嚴
操練清屯種籌略多方士卒用命甫數月風聞於虜戒勿南向
以刑部尚書召還京待屬寬而不縱嚴而不迫明敏闔爽而盡
乎物理建言十五條皆邊務 上嘉納之乙未 上策士殿前
爲讀卷官丁酉乞致仕陛辭 賜寶鏹酒饌進階資政大夫既
歸杜門謝客人罕有見其面者城南百溪泉之左構綠野堂春

日池塘秋風黍稷徜徉肆志其間者數年成化十九年卒壽六十有八贈太子少保謚襄敏

林聰字季聰福建福寧州寧德縣人正統戊午鄉舉己未進士擢刑科給事中卽毅然以古直臣自矢曰所不盡心以報國者非夫也車駕北狩內外多事侃侃在職知無不言劾光祿卿李亨太監王振家僮張伯通奸狀又劾總兵官楊洪孫鏜不協狀景泰元年轉都給事中會太監金英家人會慶殺人臺憲有欲爲英地者卽併論之內侍單增恃寵驕縱勢熾日益甚且聞大臣中有候其生日結約武弁持賄拜賀其門如往年之事王振者總偕六科十三道盡暴其罪惡乞急治之不然必蹈覆轍

既成對衆復增二語曰復起羣邪趨附之風大開小人奔競之路蓋厚嫉大臣之儉小者也既奏上卽命錦衣衛捕治駙馬石璟景帝所親信者有罪劾之不避辛未八月英廟自北還廷議迎鑾或謂虜人變詐不測遣一車二馬往迎足矣聰曰上皇北征爲宗社計也迎復禮宜從厚壬申奸人建議易儲聰欲極論而言先泄衆爲聰危聰泰然自若事雖未濟天下多之癸酉虜酋也先遣使來貢自稱可汗聰以也先弒逆雖中國不治夷狄而可納其稱謂哉詔從其議而却也先之貢一時聲望赫然忌之者如讐敵上圖保全之乃遷春坊司直大學士商輅薦其材可用尋授吏科都給事中奸人思中以法屬

鄉人教官乞便地以養親聰於銓曹白之王文以議迎復事
其異已嗾御史王溥劾聰甥爲教官因聰言得善地下獄文欲
寘之死會官 廷議文致其罪以大臣專擅選法論當死廷臣
附會文意當連名署奏牘禮部尚書胡濙謂文曰給事七品官
也而擬以太臣囑託公事也而擬以選法二者於律合乎且人
臣以宿憾而欲殺諫官無乃不可乎遂拂衣而出曰此疏吾不
預公等自爲之於是議遂罷曰再議之濙歸遂卧病不朝數日
景帝問胡尚書何不朝以病對使太監興安問疾安造問何疾曰
老臣無疾前日議事驚悸至今不安爾安問何爲曰諫官有小
罪而欲殺之此所以悸也安以告於 上旣而法司復以比擬

上 詔曰比擬殺人可乎聰得不死左遷國子學正丁丑 英
宗復辟起右僉都御史山東饑命賑貸聰詢拔能官散詣村落
給食及醫藥全活數十萬天順二年還陞右副都御史江淮鹽
徒橫行命聰往捕以便宜擒其渠魁梟數人餘脇從則用輕典
盜以寧息尋歸院已卯秋遭內艱去庚辰 詔起之固辭不遂
七月曹欽叛於京隨就擒幸功者率妄取首級至使都人不敢
夜出聰時署院事按之必生獲始論幸功者乃息餘辯明悉無
冤濫如賀二者雖欽之妻父亦以素與欽斷往還而得免成化
丙戌江淮旱人相食承命綏撫聰奏借江南糧及支運糧儲數
十萬以給民且與之種活民甚多丁亥九載滿秩陞右都御史

辛卯又有宣大之行至則邊庭寧肅尋詔還聰性剛簡不附權
貴間有短之者壬辰卽移病回籍去越二載詔復南京掌院
事十三年刑部尚書缺僉舉補之十四年加太子少保讞獄甚
明清聲益振己亥被旨偕定西侯蔣琬按事遼東復奏稱旨失
機者遂得以功贖庚子初屢乞身弗允至是又舉上諭曰卿
歷官年久公勤著稱朕方倚任不允休致壬寅又爲瘡困上
遣醫問遣接踵於門竟卒於官年六十有六卒贈少保謚莊敏
聰立朝侃侃風節天下想慕而且和氣如春厚重如山見者敬
愛無已所著有見菴集若干卷奏議若干卷先是爲都察院者
能制十三道遇事規避無所言以悅權倖士論殊不直之及聰

縮院章道中時有所彈劾當事者厭之謂聰不得鈐其屬聰曰
已旣不言而又遏人使不言誠非聰所能也詹事陸簡云聰自
抗易儲之議著直名海內士皆想望風采而郡縣聞公所至皆
惶汗喪魄救過不暇一時大臣風裁屹屹足鎮浮薄而繫人望
如公者益鮮其比至於再起則更爲溫厚謙抑與物無忤議者
雖疑其跡涉浮沉而卒亦無少貶云

張筌字廷器直隸華亭縣人正統戊辰進士景泰元年擢監察
御史天順三年陞江西副使七年陞江西按察使成化二年陞
陝西左布政使三年陞都察院右副都御史巡撫寧夏地方七
年丁憂十年起原職巡撫保定等府十一年改大同十二年調

爲刑部右侍郎十七年轉左江西有大獄連引千餘人 命往

勘皆得實十九年陞刑部尚書用刑多主平反囚不酷死者實

多會 朝廷遣內臣錄囚察情可矜疑者 奏釋若干人 賜

楮鏹羊酒二十二年加太子少保尋丁憂服闋 孝宗御極太

宰王恕重公謹厚起南京兵部尚書叅贊機務詳南京兵部

杜銘字敬修四川成都府金堂縣人正統乙丑進士

成化九年陞刑部右侍郎本年陞工部左侍

郎十年改刑部左侍郎十一年 命巡視山西邊關十六年丁

憂十九年再起原職二十一年陞工部尚書掌大理寺事二十

二年陞刑部尚書二十三年致仕

何喬新字廷秀江西建昌府廣昌縣人吏部尚書東園公諱文淵第三子也讀書穎敏過人年十一讀通鑑綱目輒了其大旨有問者備舉其首尾若道目前事聽者忘倦翰林修撰周旋嘗至其書齋見壁間懸新城朱文徽所寫丹鳳鳴陽圖旋因歎文徽多能乃徐曰此非學者所當爲也旋異之因問所閱何書對曰陳子桎通鑑續編也曰子桎書法視諸子何如曰先輩著述非後生所敢議然呂文煥之降元不書其叛張世傑之溺海不書其死節曹彬包拯之卒不書其官紀義軒則採怪誕不經之談書遼金則失內夏外夷之義似有未當旋大驚因白東園曰三郎學識不易及也景泰庚午赴江西鄉試時姑蘇韓公雍巡

按江右欲私見之辭不往及入試主司天台章際得其文擢置
第一監察御史周孔明以東園方典銓衡懼招物議乃移置第
六年會試禮部名在甲榜翰林學士江淵亦避嫌移置乙榜
例授教職辭不就及東園致仕迺登甲戌進士第觀政工部嘗
奉使淮西巢縣令閻徽少學於東園以白金文綺爲贈力却之
徽曰吾以壽吾師非贈也對曰子欲壽吾親因他人致之則可
因吾致之則不可卒不受東園聞之喜曰吾兒如是吾無憂矣
景泰七年春擢南京禮部主客司主事政務甚簡終日閉戶讀
書宗伯姚公夔重之語人曰何主事方爲時用恐其不習於政
奈何乃檄收糧至則平斗斛謹出納嚴勾稽而痛懲奸吏之侵

漁者姚公喜謂之曰推是以往無施不可矣會丁東園憂解任歸未樞密陳文定公父葬廣昌世稱吉壤其子孫貧甚欲鬻其墳爲東園宅兆喬新曰暴人之父而葬吾父吾不忍爲也繼丁母夫人憂服闋改刑部陝西司主事盡心庶獄無大小必求其情武清農家婦牧牛於野二戎卒驅其牛去婦號而請之不予錦衣衛捕盜者執之以強盜送刑部議其罪喬新曰此白晝奪人物非強盜也律當徒又有強盜舍逆旅分所劫彩繪遺主翁事覺巡徼者并主翁執之以爲同盜喬新訊得其情曰此與盜分賊耳當與強盜殊科司寇陸公瑜喜曰子慎刑如此不愧迺翁矣遷本部廣東司員外郎錦衣衛隸廣東司其官校侍衛

親軍恣橫冒禁法司每優容之喬新曰法者天下之公也有犯
輒捕治不少貸繇是官校悚懼相戒不敢犯修 英廟實錄命
各部採摭事當紀載者司寇特屬之及書上史館少保南陽李
文達公閱之曰紀實而飭以文視諸司惟謄吏牘者大不侔矣
遷本司郎中錦衣衛百戶有逐其舅之子而奪其財產者舅子
死其孫訟於官指揮使袁彬囑抑訟者抗執不可悉奪財產歸
其孫彬怒欲因事陷之遣覘事者百端攬摭卒無毫髮可指爲
罪者在刑部久凡法比禁例具通其本末陸公瑜及侍郎太原
周公瑄新安程公信潞水董公方皆重之有大獄具必以屬章
疏當上者輒使具草吏部尚書古曹李公秉知其賢屬薦於

朝陞福建按察司副使暨抵任浙寇千餘人壽寧等縣盜採銀礦
所過剽掠至則募鄉兵擊之斬首數百級擒其魁寇敗走福寧
土豪尤氏暴橫殺人出入以兵甲自隨縣官捕之輒旅拒不服
幾二十年乃設方略生致其父子置於法福清薛氏以所居瀕
海數通海寇爲患乃殲其餘黨海道以寧福安寧德銀礦久絕
有司責民供歲課民多破產特具奏減二縣銀課三之二行部
興化問民所病皆曰洪武初官以牛貸民耕而徵其租牛物故
已久而徵租如故民以是病疏以聞遂蠲其租都察院副都御
史滕昭巡撫福建檄巡汀邵延建乃遍歷諸縣訪民利病而興
除之清流之歸化里介乎將樂沙縣之間民恃其險僻不供徭

賦因自滕公卽其地置歸化縣其民始奉法令龜山先生將樂人子孫微甚墳塋蕪穢其書院亦爲戎卒所據乃修其墳復其書院且籍廢寺腴田百畝俾其子孫耕以奉祀典番舶中官死鎮守太監分其餘財遺三司力辭不得迺受而輸之庫及陞河南按察使福建都指揮僉事武成以薦授閩職行執犀帶銀器爲臚乃笑而却之曰我知君君何不知我成慙而退河南大水民間艱食舊制賑貸貧民至秋罷喬新曰令賑貸止於秋者以秋成可仰也今秋田無收賑貸可已乎命郡縣如舊賑之至麥熟乃止流民入境無食者發粟爲粥食之無衣者以庫藏帛給之所全活不可勝計河南守薛昌鹿邑令胡宏杞縣令李

皆以貪暴病民而有強援它使者不敢問乃劾其罪或徒或黜
鈞州民趙甲飲於陳乙酒肆乘夜渡河而死甲之子訟於官謂
甲與乙鬪殺而投諸河乙以鍛鍊慘酷自誣服坐繫數年喬新
獻之曰酒肆民居櫛比使鬪必有聞知肆距河且十里負屍投
之必有見之者奈何以單詞成罪乎今有司驗屍腦皮裹有沙
石忤作定爲溺死遂破械出之都御史陽城原傑招籲流民至
河南引喬新自助先是都御史項忠驅逐流民死者十餘萬及
聞原傑至皆逃匿乃馳至山谷委曲諭之流民感泣願附籍者
六萬餘戶兩覲京師同覲者多重載遺權貴獨僦車以行所載
書籍朝服而已陞湖廣右布政使荆襄大水漂溺千餘家巡撫

都御史劉公檄賑之乃躬自撫循發粟以續其食而給錢使葺其居民咸安焉荆民以徭役不均訟於臺劉公又檄理之驗其丁口登耗資產厚薄列爲九等以輕重授役民咸稱便成化十七年冬十一月陞都察院右僉都御史巡撫山西兼督三關兵備時山西連歲旱饑民米價騰踴乃發倉粟三十萬減價糶之民賴以濟北虜寇邊乃伏兵灰溝營虜至與戰斬獲甚衆陞左副都御史奉勅清理刑獄辯沉寃察隱匿咸當人心律重情輕者具以聞多得未減石爲刑部左侍郎屢辯疑獄請託無所狗屬官畏其嚴莫敢恣睢者虜酋小王子寇大同殺邊將畿內驚駭紫荆居庸二關尤急時勅巡邊相險且築城堡簡精壯

遺命為戰守備嘗獲虜諜知小王子營在邊守者多老弱又
精兵間道出搗之會虜潛遁不果用山西大饑人相食逃
他境者什四五 上命往賑之許便宜行事乃請於 朝發
內帑并賣淮鹽得銀數萬兩又勸富民及僧道士得粟數十萬
石選司府官分部賑濟死者為塚葬之又僦民疏溝渠而償以
粟所活凡三十餘萬人招回復業者十四萬人播州宣慰使楊
愛與其庶兄友不睦友奏愛奢僭淫暴等罪且云有異謀 朝
廷命往訊仍囚愛以待 命喬新言楊氏據有播六百餘年其
民知有楊氏而已一旦見其酋長囚禁羣夷驚疑恐生他變乞
審驗虛實重者監候輕者發遣 上從之既而訊鞫知友實欲

奪愛宣慰肆爲誣罔具以上請且慮其兄弟相讐殺遷友它郡邊夷以安及孝廟卽位陞南京刑部尚書到任僅二月召爲刑部尚書在南都常言沿江蘆洲率爲中官占據有訟者輒云買物進奉今陛下旣罷貢獻乞以蘆洲給還軍民由是悟中官意及在刑部拒絕請託凡大小之獄一以法律從事或脅以禍福皆不顧錦衣衛官校出入逮捕但齎駕帖到臺皆不與聞乃言舊制提取囚犯必給精微批所至比號乃行則矯詐無所託駕帖不必比號則真僞無由辨乞仍給批便又言京師大水恐內外刑獄有冤枉者乞選官審錄庶以弭災又言京師軍民習胡語服胡服此亦伊川被髮野祭之類也乞出榜禁約

上皆從之爾以疾臥家

上皆命醫診治又遣中使臨問賜以酒

米肴蔬屢疏乞罷

上不允然以執法不阿羣小多不悅御史

鄒魯等乘風誣奏喬新不自辯但解印待罪且乞致仕既而有旨仍令掌印亦固辭及錦衣衛逮證佐鞫之知魯等所奏皆誣詞上仍命致仕賣宅卽行抵家不接人事鄉人罕得見其面大理少卿屠勳及南京六科十三道累奏欲起權貴多忌之者竟不通宣慰楊愛聞先生致仕遣使致金銀爲壽并獻名梓可爲棺悉拒不受或譏其近名對曰吾道當如是也性剛介寡與歷官皆久而後遷自少好學公退書聲琅然聞戶外雖視事亦手一編不少置聞人有異書輒假錄之藏書三萬卷皆手自鐫校所著

有宋元史臆見周禮集註椒丘稿所編選有文院羣玉唐律羣玉續編百將傳郎賢琬琰集皆藏於家卒以弘治壬戌臘月巡視江西都御史林俊疏其完德邃學宜贈謚并乞謚文猶有阻者嗣是吳給諫世忠申論至正德丙子廣昌令張滌又再論

上曰何喬新學行俱優始終全德贈太子少傅謚文肅陰一子孫入監

周畏菴云公髫鬢時常以宋書趙普事實于少宰公誠云觀其沮立德昭陷於逢君之惡而史氏於其死頌宜書其爵乎若包孝肅公亦名臣也宜以爵書而否焉如公論何又嘗從容問曰吳臨川以宋舉人而仕元今預從祀之列抑亦不以此累之乎

公大異之

彭韶字鳳儀福建興化府莆田縣人景泰丙子領鄉薦天順丁丑進士除刑部山西司主事未幾丁母憂服闋改廣東司陞本司署員外郎有張岐者自外臺擢右僉都御史協管院事韶以其人非才力論其不可而願朝廷收召王竑李秉葉盛以仲公論疏入下韶獄都給事中毛弘等言韶持論雖過心實懷忠得有復職尋進本司郎中廣東爲司繁劇挾勢席寵者左撞右突乃中立不倚屹然以定雖罹咎無所悔恨外戚之臣指揮局遵與畿內民爭田願得內臣及錦衣衛官往勘踏丈量之會有旨命公正法司官以行衆咸推韶至則環視周匝揮筭工捐立

尺徑歸上自劾之奏曰田本民有雖其戶報不及管業然地有高下歲有旱潦細民頻年出賦以給公上旱則資汗下以補高仰潦則資高仰以裨污下安有空閑可以別給且民者國之本食者民之天食足則民安民安則國安豈可以民田給貴戚重傷國本也復下韶獄科道交章言其無他得釋俄而復有請荒田者 憲宗顧左右曰彼不見周遵之事奈何又請耶立却其奏庚寅陞四川按察司副使所至平冤滯黜奸蠹敦風俗恤民隱壬辰冬分巡川東道發奸摘伏每出巡郡邑民爭挽肩輿冀先至其境乙未春陞按察使韶之副憲也凡有淫祠在分司者悉去之至是以二門外有廟祀五顯其事不經趙清獻公遺愛

在蜀清風鐵面正吾憲臣之事乃與同僚謀撤五顯像而設清
獻神主於位錄朱門問答有及時政名曰政訓以自警且以勵
僚屬陳言時事宜變於今者各王府祭葬省差內官及行人等
官以免勞費從之在蜀恩威兼著淑慝自分廉而不激明而不
苛蜀人懷而畏之至今數賢廉訪必首稱焉戊戌春陞廣東左
布政使下車首集父老百十人問民疾苦與利弊所當興革者
而施行之先農民補吏視房分發其直名納公堂詔曰取其財
而責以不貪可乎選俊秀善書者充之而積弊遂革鎮守內臣
顧恒歲有進貢之儀里胥乘之求索多方民不勝其擾上疏言
自古明王不實遠物廣東民力竭矣守土臣以此事上爲恭不

知凋傷國本遺害反大也監舶內臣韋春請以均徭餘剩六十戶隸舶司爲造辦貢獻之需又疏言今之官民富強不及於昔者蓋因害財之故也使及今十分愛惜加意樽節猶恐無以爲繼况又更他端而益以雜用其何以善後哉願將春所奏餘戶暫與一年以後逾年停罷臣民幸甚有詔減其半陳公甫以學行有聲於時特薦於朝曰國以仁賢爲寶臣才德不及獻章遠甚猶且叨食祿顧於獻章醇儒乃未見收用誠恐國家坐失惟善之寶至凡廣南一名士皆折節下之每於朔望受民詞日至千百紙決斷如流告戒諄諄如召子弟民卒感之至有不平輒耻見詔而自去者儀門外有土神廟亦更爲叅政汪公廣洋之

祠最後太監梁芳弟錦衣衛千戶某在鄉國私採禽鳥等物進
貢官民俱罹其害復上疏言狀忤旨調貴州布政使濱行之日
廣之父老涕泣河下如去慈親追送數百里外者若干人蒞貴
藩竟九閱月因俗爲之設施貴人安之亦如廣南先是太宰歷
城尹公旻屢言其賢可大用 憲宗以是亦深知之甲辰夏送
擢都察院右副都御史巡撫蘇松嘉湖等處雖聲稱凜然而鎮
之以靜不尚擊搏吏自不敢犯科而民益樂其豈弟乙巳夏召
爲大理卿未上坐論鎮守內外等官貢獻非宜道改右副都御
史巡撫順天等處兼整飭薊北軍務陳時政以彈天變議權運
以便軍民多切時宜迨 孝宗登極臣僚交章論薦召爲刑部

右侍郎屬浙西不靜承詔巡視至則誅厥渠魁數人而劾罷守
臣一方晏然弘治元年春戶部言兩浙鹽法久壞命以本官
兼左僉都御史留治之詔早夜講究利病所在而叅伍其說以
浙西通舟楫鹽利多於浙東而浙東亭戶抑配尤甚因定其折
價銀之輕重及處州等處課額宜殺凡便宜事數條奏行之又
憫煮海之氓貧苦以其山場草蕩晒淋煎熬折閱征陪之狀略
分八節具圖以達宸聰三年轉吏部左侍郎時三原王公恕
爲尚書得詔爲貳皆不避權貴請謁路絕人服其公庚戌冬彗
星見於天津詔大臣言軍民利病時政得失具言軍民利害
曰厚根本曰減役錢言時政得失曰正近侍曰慎官爵終篇又

言 朝廷一日萬幾安能勞心周溥臣願 陛下執其要焉臣
獲隨午朝心念日奏尋常起數於事無補照 祖宗勤政之典
乞師其意可也臣願自今午朝惟議經邦急務如吏部有大陞
除禮部有大災異戶部兵部有緊急錢糧邊報工部法司有緊
關工程囚犯之類許先期開具事由奏乞 聖駕定日出御左
順門侍衛一如午朝之儀事該各衙門會議者各官就於御前
公同計議如吏部陞除大臣明言某官才德堪任某官資望未
可之類內閣輔臣亦同在彼詳論可否事體既定就行口奏取
旨奉行次日補本備照若係本衙門自行者亦就 御前逐一陳
說有無事故兩疑情由請 旨定奪若是事體重大一時難決

者聽各官先行博議於下候至朝時再議奏行仍乞 溫顏俯

詢曲折如此不惟世事日熟於 聖明耳目而羣臣高下邪正

亦自可見有事則行不分寒暑無事則止勿勞 聖駕旣不廢

午朝之典又可率羣臣興事則凡時政得失軍民病利自可次

第張弛矣 上嘉之壬子夏陞刑部尚書數日 命侍經筵詔

掌刑憲務明慎而以忠恕爲本嘗言刑以弼教使之畏威遠罪

導之以善耳遇有骨肉相殘者輒憂形於色曰是吾之刑罰不

足以止姦也謹於守法而亦嘗有法外之意性素鯁正貴戚中

官往往爲之斂手時安遠侯柳景總鎮兩廣都御史秦公紘發

其贓貨鉅萬事聞時低景於法奏褫其爵景挾戚睨於內降欲

以破公議之是非擠泰於危地仍執奏不易 朝廷不從復下
大臣廷議竟亦如韶言其後景賊銀追及八百兩有 旨免其
餘欠復言 陛下優待貴近之臣如此臣固知 陛下有所不
得已也但臣等忝列守法之官不宜阿順以圖自便景應追賊
數十未及一乃特蒙 恩盡行蠲宥海內聞之貪饕之徒窺此
舉措一旦釋之其如物論何且景賊既可免他日爵位亦可嘗
求而復矣爵位既復又可營求出鎮矣奸回藉口良善解體誠
非國家之利也疏入不從左右有不樂韶所爲者摘官屬細過
以怵韶而伸已志韶坦然由之終不爲所疑沮會亢旱求言復
因事納忠條陳四事其一以本部爲荆燕人事會本復奏今半

月有餘未奉 勅旨及他奏請問有句日方纔得旨者臣謂今日正一日二日萬幾之時若優游少斷不惟事見停滯亦恐志生驕情羣臣左右安於故常不敢有所論列也四方傳聞甚非細故此時政之得失一也又該本部先前問得內使內官王萌苗通高永犯該絞罪俱各屢訴冤枉荷蒙 聖慈饒死發充淨軍臣聞自古帝王雖貴近必刑者所以彰天討之公若救人不死復何所畏憚乞自今以往勿復輕縱庶得法度均平人心悅服此時政之得失二也本部又先前問得百戶謝原管領隊軍何三等往昌國公墳上做工何三爲脫逃不還工錢被謝原脚踢身死臣看得世情艱難財重命輕殺人犯法時常有之固非

爲此一事但聞道傳言今修 皇親昌國公張巒墳塋比諸往年勲戚之家相去懸絕凡百制度務爲宏壯差官領軍萬數輪流上工計年不足恐非人臣所敢當計巒在地下豈能自安是則雖曰愛之非所以美之也上工官軍畏怕筆楚不得已出錢雇人中間貧乏者隨上隨逃而管工官員又復請益前後展轉不得息休豈得無怨讟哉此軍民之利病一也本部又問得東安等縣知縣朱華等被 神宮監官奏其違例差役 陵戶臣看得順天府所屬州縣正役頗易應當雜差實爲浩翰其丁多殷實之家往往投充 陵廟墳戶及勇士校尉人匠各色身役以避民差致將見戶重疊加役富者累窮貧者逃竄宜將墳

陵等戶定與優免幾丁餘者仍發州縣相兼見戶均當差使庶彼此各得其所此軍民之利病二也皆時所難言者三月充廷試讀卷官先是以疾在告疾寢加上疏乞休上勉留再三仍令支俸在家調治韶方以素餐自劾而上眷益隆近臣醫官數命來視是年六月疏復連三上上命乘傳以歸有司月給米二石歲撥人夫四名歸里後卽擇葬地於縣之文賦里石鼓山蓋不復有當世之念以乙卯正月卒年六十六贈太子少保謚惠安韶天資粹美涵養深厚其學以儒者爲宗務清明其心以求聖賢氣象色和貌溫而嚴毅果敢之氣自形終日端坐非緡閱經史則省察性情處已待人一於誠敬使人可尊而不可

狎聞人片善則必紀錄服食器用不求鮮美玩好之物泊然無所動於心與之居竟日卒未嘗見其私喜愠在官守處事精明馭吏嚴整事無巨細必身親視國事如家事視民疾苦如己身至誠貫徹上下所至如春風和氣著物隨所寓無不發生其立朝直前無所畏縮忠義激發不以禍福嬰懾讜言至計所以開上心採時弊別白是非邪正排姦佞而觸貂璫務使爲善者有所恃爲惡者有所懼暮年名德益尊而其自處退然如無所有是以上則九重知之愈深下則賢士大夫望之愈重以至行旅賤隸亦皆知名云所著有名臣贊錄三卷續修蒲陽志十卷在蜀有成都志二十五卷在吏部有天曹日記差祀恒山有北岳

代行稿爲尚書有秋臺錄平生雜著詩文名滯稿總若干卷奏
議一卷

尚書林俊褒異舊臣疏略曰臣聞何喬新與彭韶先爲刑部屬
官並負盛名積官俱至尚書韶忠亮懿醇喬新貞方恭順又各
儒術精究吏事熟安得古人之深以同任天下之重當時言完
名純德文學政事節槩皆屬心焉韶沒有贈有謚仰悉我聖
天子優異名德盛心然韶文學經緯道適中和危言峻行廉聞
貞風文有也正有也忠與恪與清與憲則又有也其視葉盛學
行同而事功過之葉盛得謚爲文彭韶宜無所靳况吳訥謚文
恪魏驥謚文清彭韶實足並美嗣休又宋臣歐陽修謚文忠范

仲淹謚文正論者謂韶正色立朝先憂爲國生今之世無媿古
人沒而易名宜亦近之不知定議之時何取惠安之義舍大錄
細不類其人不足服中外之心爲後世史書之信事雖不行士
論稱快

白昂字廷儀直隸常州府武進縣人天順丁丑進士授南京禮
科給事中改刑科給事中成化戊子轉左旋陞都給事中歷應
天府丞十二年陞南京大理寺右少卿十六年改北十八年陞
南京都察院右僉都御史二十三年陞南京兵部右侍郎弘治
二年陞刑部左侍郎署掌都察院事三年改戶部左侍郎治河
原武四年陞掌院右都御史六年陞刑部尚書加太子太保

東官出閣進光祿大夫柱國太子太保初昂爲給事中劾戶部尚書張鳳不法自南京逮至 詔獄已而釋焉成化初邊警屢至經筵少輟上言帝堯不以洪水之災而輟明峻德太王不以昆夷之侵而殞厥問 聖德修則邊患息矣時黃霧之災又上言六事大略謂 陛下卽位嘗詔罷貢獻矣而貢獻不絕嘗罷織造矣而織造自如嘗禁權豪不得種鹽矣不得求地矣京城內外不得創寺觀矣而皆不爲停止願守大信勿以親倖而易其度其餘亦當世要務會監察御史謝文祥得罪率僚屬言文祥雖涉狂妄然其心則無他因而竄逐則忠良喪氣直士杜口恐非社稷之福也丞應天興學校抑強植弱所定義役至今以爲法會

劇寇劉通出沒海上東南騷然昂以都御史調士卒遠近皆會
截其要路賊大窘廼宣布威信通挺身納款特於太倉學宮受
之諭以禍福出於至誠通感泣廼縱之歸歸率其餘衆以降執
通送京師餘縱不問東南晏然復奏沿江要害守備等官互相
應援又請關防以便行事遂爲定式鳳陽 皇陵并白塔壽春
墳圯昂以南兵部右侍郎與平江伯陳鏡等治之時東南歲歉
而興大役民以爲憂始賦工者計費當若干萬期以七年至二
年而竣且以餘財賑濟民忘其歉河決金龍口將潰運道昂以
河故道入渦者今不可復尋廼自陽武封丘祥符蘭陽儀封築
長堤以防張秋之決又自中牟決口至尉氏縣下潁州經塗山

仍歸鳳陽合淮入海築汴堤高卑廣狹樹之萬柳以固堤又命
郎中婁性於宿州濬古睢河入運河以分徐州之勢主事謝緝
築蕭縣徐集等口以殺汴徐之勢又堤運河自魚臺至德州自
德至吳橋復修古河堤東平至興濟作減水河一十二道大青
河及古黃河以入海每河口作石堰盈則泄縮則蓄以濟運河
由是河漸復故道漕運無虞高郵湖善覆舟乃議開複湖於東
岸以避其患巨四十餘里時議者多不便昂執之堅至於令舟
行往來免風濤之患人名曰白公堤其在都察院以爲 朝廷
之耳目凡御史出巡必令詢訪所屬廉污勤惰才鄙狀以報因
以所報真僞爲御史升黜又言方今天下衛所士卒十去有五

所司侵牟弊孔百出宜預覈尺籍定數使較然畫一俾清戎御
史按籍搜考庶絕訐擾欺遜之弊又言天下奏報災荒多不實
或以荒爲稔以稔爲荒其弊實多宜令御史覈實天下田數高
下之則藏之官旱則蠲高水則蠲低庶其弊可絕咸納焉其在
刑部一以矜恤爲心嘗自誦曰君子之心公而恕又曰秋霜之
肅何如春陽之溫故凡情可矜疑者多得平反御史李興以詰
暴處死無敢言者昂曰不可使 朝廷有殺諫官之名廼率衆
大臣上言興固可罪然所致死皆有罪興而處死則故勘故殺
一者又將何以加之興得免死嘗患條例繁多吏得下上爲奸廼
芟復釐龐定爲若干條奏頒之内外官司守以爲法於是法令

始一矣昂立 朝不爲危行議論每依於忠厚善裒高益卑因
事爲功平居恂恂若無能臨事決機應變無所疑滯不爲崖岸
表襮上自王公貴人下至輿皂無不得其謹心居官四十餘年
未嘗嫉怨於人但性尚員通比匪人不免於言者云己未以病
在告疏屢上 詔允進太子太傅馳驛以歸給月俸輿皂以優
老旣歸園亭賓客極一時之盛繪圖賦詩以傳癸亥七月以疾
卒年六十有九贈太保謚康敏昂雖位極公孤而左右無媵妾
於孝友尤篤少時繼母王氏夫人有疾每夕稽顙北辰旣而果
瘥念弟昇蚤世恤其二孤訓迪備至以潔充書筭垣爲太學生
近制三品以上得遣一子入太學舍其子而與姪人尤難之在

兵部時則推范文正之遺意置田若干畝以贍其族貧者或給之耕具立義學二一集族之稚爲正字畫句讀一集其秀者授之舉業又立祭田若干歲時三祭自始祖以下咸預祭畢讌長幼因而合族又設藥局儲善藥鄉之疾病者多歸焉

閔珪字朝瑛浙江湖州府烏程人天順甲申進士選授山東道監察御史屢劾大臣之不法者罷之成化六年擢江西按察司副使丁憂已而起復改廣東進按察使庾嶺介南雄南安間二境爭田不決方會勘衆忽嗷呼爲變人勸珪少避珪不動徐爲處決令下兩境胥悅散去新會民嘯聚山谷爲亂諭以義貸其逋負遂安堵如故二十一年江西南贛盜起擢都察院右僉都

御史巡撫江西至則舉廉黜貪勸賑薄賦且疏盜賊之作皆巨室是由欲連坐之仍革豪右橫取之弊京官由是多不悅會妖人李孜省得幸因言珪不勝任左遷廣西按察使弘治初復都御史巡撫畿甸經理儲備修濟城濠元年進刑部右侍郎三年改左四年陞右都御史總督兩廣軍務番禺龍水柳慶平樂徭獞相繼爲亂令其下討平之其討古田也都督馬俊及叅政馬鉉敗死時以致敗自俊乃引咎自劾時議又欲濟師珪謂罪止首惡乃設重購緝之已而賊果自縛又歸功於下安南使臣奏入貢道憑祥龍州輒爲所梗詔下處分珪曰是亦各有罪焉乃行安南毋得挾私貨行憑祥無得阻貢物二夷爭遂息

在兩廣通行鹽之地而軍儲以濟立定順長官司而蠻人不爲
變八年進南京刑部尚書尋改左都御史掌都察院事加太子
少保因近年問刑比例繁滋奉 旨與刑部芟蕪摘要共若干

條上之至今遵行十三年遷刑部尚書珪前後在法司屢治大
獄皆會切情法加以仁恕樂工袁林以罪瘐死獄中選人以刑
部郎中丁哲濫致之死也事連御史陳玉下 廷議時以事出

中貴相顧莫敢發乃獨擬如律及吏徐珪以死辯哲究并下獄
深治又執如初竟俱從未減遼東都指揮張天祥襲殺虜爲功
大理少卿吳一貫當其罪死會天祥死於獄 孝宗大怒親鞫

於廷欲置一貫重辟珪與都御史戴珊進曰一貫推按不實罪

當徒 上怒不解又力諍曰法如是足矣一貫罪止貶官宣撫
逮妖人李道明蔓延百餘人巡撫者欲張大以爲功珪讞罪止
道明餘悉縱免正德初逆瑾用事遂請老 詔允加少保乘驛
以歸辛未卒壽八十有二贈太保謚莊懿珪少讀書於廂房之
東楹偶徙而西忽驟雨震霆破其楹及出巡徑深山甫及岸而
一梁陷殆若有神相之者少則以韓魏公自期其後中外焯
著動烈雍容廊廟不見運動而天下陰受其賜之二

屠勳字元勳浙江嘉興府平湖縣人舉成化己丑進士授工部
主事分司清江浦督造運舟公廉有能聲三原王端毅公適總
河事與督運憲臣交薦謂可大用滿考改刑部歷員外郎郎中

所處皆劇曹剖決如流無滯枉每獄有疑及事干權貴者尚書
林公聰皆屬之罔不協服京城無籍子李勝誘其主之子福爲
私鑄而陰令訪事者發其事福坐戍邊衆知其冤莫敢問勲曰
此奴利主之產也爲直其事以福罪罪勝而歸其產又有林都
事素挾有依附構訟蟠引不可解及覈得實雖爲所誣訐然卒
論如法直聲益起甲辰遷南大理寺丞弘治辛亥進大理右少
卿本年轉左上十事若暑月疏決罪囚兩京一體五歲一遣審
錄州郡刑獄多見采納漳寇煽亂上勅撫處至則論其禍福
誅首惡黨與悉不治時夏苦旱訖事雨閩人稱之甲寅擢都察
院右副都御史整飭薊州諸郡邊備巡撫順天永平以近畿役

重民貧京邑尤甚疏請裁省夫役昌平密邇山陵供應浩繁
疏停牧馬以示優卹其經略邊備奏分薊州密雲建昌三路屯
兵緩急相援於湖河川築拾城虎落設險居守及增置黃花鎮
營堡戍兵聲勢聯落虜自是不敢輕犯又奏徙熊兒峪馬營於
便地就水泉人免病渴猪圈頭關多水患歲苦修築亦奏徙之
南北水峪歲省役卒數百人寶坻白龍港產銀魚中使歲取供
薦因之橫索民不能堪麻峪山有銀礦守臣以中旨索之皆疏
言其不可詔戒約中使而礦事卒不行丁巳遷刑部右侍郎
尋進左會戚畹壽寧侯與河間民構田訟奉旨覈勘上言食
祿之家不言利况母后誕毓之鄉而與小民爭寸地臣以為不

可。孝廟嘉納卒歸其田於民十六年內艱服闋改左副都御史復刑部左侍郎九載考績擢右都御史協理院事。武宗嗣位首上郊祀籍田幸學三事且以正心講學爲本謂初服新政宜求實意勿徒循故事爲美觀又請日以真西山大學衍義進講中外傳誦之丁卯拜刑部尚書時逆瑾用事諸司諷先關白而後奏聞勲執不從曰若是不惟三尺法可以喜怒高下亦且無朝廷矣瑾啣之乃引疾求去加太子太保致仕。賜勅給驛歸未幾瑾敗又八年卒贈太保謚康僖勲性穎敏甫成童已學貫經史有重名嘗曰士當無書不讀雖屢更劇曹恒手不釋卷尤善詩歌倡和皆一時名公其行義鄉評尤重若辨家廟昭

穆置義田義塾皆可爲世法

王鑑之字明仲號遠齋浙江紹興府山陰人成化戊戌進士初任直隸真定府元氏縣知縣至則減稅蘇困完積年拖欠錢糧除土惡孫整等數人民樂其業元氏遠鄉居民多被寇掠者一聞寇至不分晝夜寒暑卽率附縣民兵數騎速往交界處劄須吏民兵雲集其富家率子弟兵來者甚衆寇知有備遂他往元氏自國初科第乏人特親課生徒不數載登進士者魏倫趙惟藩二人鄉試者智通智經智佑三人後離任遠近相送者如失父母擢江西道監察御史奏劾寵妃失序中貴忤權杖之下錦衣獄得復職差往直隸河南等處印記孽生馬疋萬計巡按貴

州辨死囚劉英等一十五名口俱得生劾方面等官崔昇等九
十二員貪風頓息劾土官楊泰等八員俱落職征勦久叛蠻夷
長脚雞選等并招撫過楊安等一百七寨弘治四年督學南畿
公正剛明適大理寺右寺丞缺科道相應者爭薦太宰耿公裕
不然且語衆曰必得譽望服群爭者如南畿提學王御史可也
衆議翕然提學陞九卿者自鑑之始江西宗室有官人逃出濟
臬執留奏誣以官闡穢汚 上命往鞫之乃坐王以用刑過嚴
而藩臬失體擅留官人之罪各相奏辨有附執政者更 命刑
部侍郎戴再鞫之反案奏 聞因其異遂提取來京 躬自臨
朝訊鞫鑑之待罪閣下 上悟曰古人之待宗室甚厚盡從前

擬遂受知 孝廟後遇宗室事必屬之及考績陞本寺右少卿

山西宗室互相訐奏往鞫之寃撥置者俱置之大辟宗室之罪有差陞左少卿十三年十一月北虜寇偏頭關 上命改僉都

御史奉 勅便宜行至則增要害撫軍士禦虜有方虜不敢犯

劾太監總兵等官羅玉等巧取軍士財物邊境肅然奏繳復任

陞左僉都御史撫治鄖陽等處振肅綱紀所屬揣有不可容者

皆望風解綬而去時有不堪者乃自草疏投於所厚近侍者謂

撫治之官古之所無今之暫設者也欲取回京時有待選士效

借寇故事并疏政事以謂一日不可無此官奏 聞寢其事陞

左副都御史巡撫湖廣奸豪膽落吏畏民懷正德元年陞南京

刑部右侍郎二年轉刑部右侍郎之任轉左時河南徵世子屢
奏庄田不結 命往鞫之係民者悉歸於民上下帖然陞俸一
級推南京都察院右都御史陞刑部尚書 賜玉帶會逆瑾擅
權籍沒錢都御史家產瑾欲罪擬妻奴執法不從將男分戍各
邊事畢正德三年冬引年七十三疏力辭 勅馳驛還鄉自任
官無被劾家居田不滿頃管糧蘇通判令人送俸至卽答詩謝
曰老大登朝四十年何曾問舍與求田歸來幸遇蘇司業日日
令人送酒錢正德十四年秋以疾卒壽八十四
洪鍾字宣之浙江錢塘人成化乙未進士授官刑部主事諳習
憲典大司寇林聰器重禮信之委總諸司章奏擬議大獄取裁

於鐘聲聞驟起庚子陞員外郎癸卯丁內艱丙午起復陞郎中
尋慮囚山西丁未江西福建流賊甫定承命往審處之歸言
福建之武平上杭清流永定江西之安遠龍南廣東之程鄉皆
流移混雜習於鬪爭以武力相尚是以易闕而亂譬若羣豺虎
而激怒之欲其無相攫噬難矣宜及其平時令有司多立社學
以訓誨其子弟銷其兵器易之以詩書禮讓庶幾潛化其奸宄
時以爲知本之論弘治己酉陞江西按察副使癸丑陞四川按
察使所在發奸擿伏無所撓避而聽決如流庭無宿訟自土官
宣慰使皆懍懍奉約束安氏世有馬湖驕僭爲地方患從容畫
策去之請吏於朝遂以帖定丙辰入覲陞江西右布政使

丁巳轉福建左布政使戊午陞都察院右副都御史巡撫順天等府兼整飭薊州諸邊備時朵顏虜勢日猖獗鍾以邊備積弛乃建議增築邊牆自山海關直抵居庸延亘千餘里繕復城堡二百七十悉城沿邊諸縣官無浪費而民不知勞又奏減防秋官兵六千人歲省輓輸犒賞之費以數萬創建浮橋於通州以利病涉毀永平陶窰以息軍民橫役之苦奪民產及牧園草場之入於權貴者而悉還之遠近大悅然權貴人之扼勢失利者數短於上遂改雲南巡撫再改貴州頃之召還督理漕運兼巡撫鳳陽諸處正德丁卯陞右都御史仍董漕政戊辰命掌南京都察院事尋陞南京刑部尚書己巳正月改北京工部

國朝系
卷六十三
四月復改刑部閏九月以刑部尚書兼都察院左都御史掌院
事詳都察院

劉璟字

河南開封府鄆陵縣人成化乙未進士授刑部主

事歷員外郎郎中二十二年陞松江府知府弘治七年丁憂十
年補太原府知府十三年陞四川右叅政十四年丁憂十七年
服滿補山西右布政使十八年陞山東右布政使正德二年陞
山東左布政使未踰月陞都察院右副都御史巡撫宣府地方
本年陞刑部右侍郎四年陞刑部左侍郎本年陞刑部尚書加
太子少保六年致仕侍郎崔銑云正德五年逆瑾就捕璟奉
詔獨決罪罪釋釋無出入縉紳稱平後子認亦爲刑部尚書

何鑑字世光浙江紹興府新昌縣人成化己丑進士授宜興知縣擢山東道監察御史歷河南府知府歷山東左叅政四川右布政使轉左弘治六年陞都察院右副都御史巡撫應天等處八年丁憂十年起撫山東十二年己未冬陞刑部右侍郎命訊周藩大獄復命稱旨賜羊酒寶楮陞本部左侍郎辛酉秋奉勅同三法司審錄罪囚賜羊酒冬十一月山東兗州等府直隸徐邳等州大旱奉勅便宜賑濟首陳五事悉報可時巨盜弄兵亟命有司賑濟饑民招撫流亡牛糞種穀區畫備至壬戌七月訖事賜寶楮以勞之九月太淑人訃至淑人石氏亦卒於京邸即日奔喪南還乙丑服闋鑑以刑部左侍郎兼都察院左

僉都御史清查河南湖陝三省瀕行 孝廟賓天 嘉武宗嗣位

復申命鑑乃刊條申詳 勅旨二十餘事丁卯春陞南京兵部

尚書叅贊機務辛未春正月 特召爲刑部尚書三月朝見

命侍講經筵讀廷試卷賜通鑑纂要四景回文詩夏四月當慮囚

之期 上命太監張永請大理寺僭部院審囚凡矜疑關實奏

疏悉出其手明允稱 有賜羊酒夏五月嘗錄未竟 止允廷

議改兵部尚書奉 勅提督團營軍務後加太子太保詳兵部

張子麟字元瑞直隸真定府藁城縣人成化甲辰進士授南京

大理寺右評事弘治三年陞南京大理寺左寺副六年陞左寺

正在理寺剛直精慎刑讞駁正無所避以平允稱九年陞汝寧

知府訟平賦均膏濡弘洽及報政 孝皇賜燕服汝民相與銘
頌之十七年陞山西右叅政澤潞等郡歲饑志切焚溺濟以
宜亟於傾廩緩於稽券所活民以萬數計正德二年陞河南右
布政尋轉左時鎮守巨璫恣橫不法執其黨屬罪之而地方以
寧三年陞右副都御史撫荆南值凶歲復以行諸山西之法賑
之所活民四十餘萬急邊圉謹儲備戒戎律飭官宦撫居勦叛
舉良刺頑罔不秩然各究其實未幾改督南京糧儲尋陞刑部
右侍郎六年轉左本年陞本部尚書十一年加太子少保十四
年改太子太保屢更諸大獄若逆藩鐫濠及逆瑾寧彬輩相繼
不軌麟優然決斷悉抵於法十六年 世宗卽位特加眷遇屢

荷白金彩幣寶鈔羊酒玉帶蟒衣之賜至於賜給人口及歸省
給鈔爲路費咸爲殊典麟貴時二親在堂生膺一品之封朝
廷命有司具牲米存問恩榮特異後以親老乞休賜允得歸
養嘉靖二年御史張鉞劾張子麟交通逆藩且以王守仁等爲
證子麟疏辨其誣上并命守仁等上其事原巡按江西御史
伍希儒言所見有子麟名在宸濠餽籍中未見子麟啓詞御史
何鰲論希儒畏罪諱過故不敢言旣而操江都御史伍文定及
王守仁俱以實對但云濠黨多有僞造書啓以欺濠罔利者欲
以寬子麟而御史沈灼給事中毛玉等並請亟誅逆黨以快人
心并謂守仁大臣勘事不宜持兩端於是都察院覆言子麟交

通逆藩有狀宜正典刑希儒先爲御史不言則爲濠黨所詐未
可必而原啓已燬事且在濠未叛時臣等不敢輕議幸 上裁

擇 上竟寬子麟第革原職冠帶閑住優游林下者二十餘年
享年八十有八以終訃聞 賜諭祭者九遣官營葬

林俊字大用福建興化府莆田縣人成化戊戌進士初授刑部
陝西司主事性侃直欲以經濟自見不與世浮湛推獄務明允
事干權勢貴近莫適爲處者大司寇林公聰多屬之不撓執法
名益起二十年陞四川司員外郎時妖僧繼曉挾近幸梁芳以
祕書進得被殊眷發內幣銀數十萬兩營建大鎮國永昌寺俊
上疏極論繼曉本一儉險小人市井無賴曩者猥指邪術欺誑

楚府及至事敗挨拏却乃竄身逃罪不圖自新益加縱誕潛住
京師多方夤緣誤蒙 聖眷疊賜異恩五尺兒童切齒唾罵敢
復肆無忌憚惑亂 聖聰發內庫銀數十萬兩蓋大鎮國永昌
寺以可用之財供無益之費國計且日削矣以 陛下超三邁
五之資蹈唐憲梁武之轍聖譽且日損矣下人師師爭先事佛
聖政且日壞矣居民重遷工役不息人怨且日興矣臣謂不斬
繼曉異日之禍未可言也然縱之者梁芳也梁芳傾覆陰狼引
用邪佞排斥忠良輔之者驟得美官觸之者動遭竄逐欺罔如
趙高奢侈如石崇數年之間假以進貢買辦爲名盜 祖宗百
餘年之府藏殆盡家資山積尚銘不足多所在風擾汪直莫能

過乃復薦進繼曉陰求蓋寺虛耗內財飛語外聞謂其立意不肯爲是 陛下逼脅只得屈從是畏天下議已欲 陛下專擅謗耳言甚激烈 憲廟怒不可測俊自分必死料理家事待罪於 闕下尋下詔獄加刑俊對愈厲後府經歷張黻上疏論掾併下獄太監懷恩叩頭諍曰不可自古未聞有殺諫官者我

太祖 太宗之時大開言路故底盛治今欲殺諫官將失百官之心將失天下之心柰何臣不敢奉 詔 上大怒曰汝與林俊合謀誦我不然彼安知我宮中事用 御硯擲之恩以首承硯不中復怒朴其筆恩脫帽辭於 御前號哭不遑曰不能復事

陛下 上乃命左右扶出至東華門使謂鎮撫司曰若等諂梁芳

合謀傾俊俊死若等不得獨生乃徑歸卧於家自中風疾不復

起視事

上命醫調治使者旁午於道怒意稍解謫遠方俊得

姚州判官黻師宗州知州時言路久塞臺諫禁不敢作一語由是二人直聲震海內三原王端毅公在留都疏乞還之以勵忠

會元日星變

憲廟感悟敘復南刑部貴州司員外郎 孝皇

踐阼廷臣交薦之權雲南按察副使谷崇釋信鬼鶴慶玄化寺

稱有活佛歲時士女會集動數萬人爭以金泥其面俊按鶴慶

命焚之父老言犯之者能致電損稼卽與約積薪伺之果電卽

止無它驗遂焚之得金數百鎰悉輸之官毀邊方諸淫祠三百

六十區四年陞按察使五年調湖廣俊偉望宏才風儀整肅官

定欽哉不致犯會境內雨雪災異上疏陳言時政大略謂貴州
借調官軍措運糧餉苦戰間民疲輓輸又德安安陸蓋造王
府及增修古府工役浩繁財費鉅萬民不堪命乞循寧襄德府
故事一切省儉勿用燒磚及白石雕闌著爲定例九年養病十
一年起廣東右布政使仍舊養病十三年拜僉都御史提督巡
江時陝西地震水涌土疏謂變不虛生必有其應歷述漢晉以
來宮園內侍柄臣之禍且乞減齋醮清役占汰冗食止工作省
供應節賞賜戒逸欲遠佞幸親賢人謝方石見之曰字少意長
近時章疏當爲第一十五年命巡視江西著社約立社長社正
以主之去淫祠表忠賢禁奸弊雖市販小害必懲之鋤強扶弱

風紀肅然時寧庶人貪譎恃害倍取祿米官校害人侵牟民利
悉裁抑之其奏易府殿琉璃瓦疏極言其非謂乞斷大義特垂
善處毋涉吳王几杖之賜叔段京鄙之求時濠雖橫未有逆萌
或以爲過後卒如俊言人服其先見云十六年改巡撫尋守制
武皇初政起巡撫江西俊上疏力辭四年改撫四川時逆瑾雖誅
而張永繼用事武廟好遊樂時宿於外而皇儲未建俊甚憂
之五年遂於川中復上疏請上還內宮擇宗室之賢養於別
宮收召先朝故老劉健謝遷林瀚王鏊韓文以修復舊政又言
瑾雖死權柄猶在宦豎安知後無復有瑾者其詞指劄切大忤
左右用事者時藍鄠之寇方劇至卽宣布聖恩剝撫並行屢

以捷聞六年六月陞右都御史七月復疏乞賊平容徑回致仕
忌者謂盜已衰易爲竟批允先是軍中奏功多爲中外權要冒
報俊一切不許自是諸捷恩典寢薄賊未平卽與致仕朝論太
駭科道保留不得及歸蜀人號哭追送未幾而兩川之寇復熾
矣 世廟在藩邸久知其名入繼大統起工部尚書尋改刑部
尚書俊屢上親大臣勸聖學闢異端諸疏太監崔文寵擅一時
其私人李鳳陽以科斂匠作財物及御史叅奏崔文需索夫錢
事下刑部文寅綠內降差校尉取李鳳陽等付鎮撫司問理俊
據法執奏不遣有 旨還送鎮撫司俊又奏言奉 詔則違法
守法則違 詔臣寧違詔不敢廢法 上怒雖不加罪而鳳陽

迺改錦衣衛獄俊又疏谷大用竊弄威權蠱惑先帝假勘地之名混占產業莊田至一萬有餘頃侵欺子粒官銀至百萬有餘兩利歸私室怨及朝廷若不明正其罪何以警戒將來况今水旱相仍人民十分饑困追其所侵贓銀之半足以少備賑濟之需與其積於一家以利蠹國之盜臣孰若散於窮民以溥朝廷之恩澤伏望將谷大用提問追贓則可以平人心之怨憤可以彰天討之至公不報俊以不得其職乃乞致仕在刑部立朝僅十四月暮年遭際誓竭忠愫以仰禪新政然尤以保終完名爲念遂乞休八疏乃允賜勅以行士夫祖餞於都門外道爭嘆其賢論者以數十年來大臣以禮進退無瑕隙可議者俊

一人耳於嘉靖 年卒於家

侍郎鄭岳云公性簡儉居官尤廉約不取隸金不費公廩蕭然若寒素深厭末俗侈汰直欲以身爲鄉邦表率一時同德諸老推先焉

尚書楊廉云先生平生不戀官爵不趨權勢不擇利害不畏強禦抗犯顏敢諫之節高難進易退之風用兵以殺降爲大戒以撫綏爲上策蜀人咸畏之如神明比之宋張詠云

金獻民字舜舉四川成都府綿州人成化甲辰進士除行人司行人弘治四年擢浙江道監察御史明習法律嘗按雲南善處夷方事再按順天益著風采十一年陞山東副使爲天津兵備

十五年守制十八年補湖廣副使正德二年陞湖廣按察使木
年謫爲民五年起貴州按察使本年守制七年補山東按察使
八年陞都察院左僉都御史巡撫延綏等處地方本年回院管
事九年陞都察院右副都御史十三年陞刑部左侍郎十五年
陞南京刑部尚書十六年改都察院左都御史掌院事嘉靖二
年遷刑部尚書本年改兵部尚書不妨部事兼督團營四年以
哈密事往及還以原職致仕

趙鑑字克正山東青州府壽光縣人成化丁未進士授知蕭山
縣在縣廉愛有惠政去後民思祠之擢監察御史歷視馬政鹽
法奉命按宣大時虜酋火篩犯境朝命平江伯陳銳等帥

兵討之師久不進上疏劾之又陳方略甚悉於是兵將奮勇連戰皆捷虜爲遜去爲御史久數推京寺要職值逆瑾事出知安慶府旋改順德府瑾誅乃擢浙江叅政陝西右布政使正德八年進右副都御史巡撫甘肅歲大侵上疏請出內帑賑之及貸富人貨緡易粟隨所在給以粥食全活甚衆又令官給牛種勸之使耕次年遂大穰又浚渠招屯募民益兵邊務大修又却吐蕃復哈密奪地 璽書嘉勞十年改視南京院事復 命十一年 命清理閩浙鹽法入視院事轉大理寺卿鑑於法比素精覈而宅心平恕歷南京刑部尚書嘉靖二年改刑部尚書命艾治諸巨奸種種按伏咸得其情逆濠之變宗室坐繫者衆上疏

止坐元惡請釋其株連者以故獲全者二百餘人一日待漏直
廬朝士有憐寵徑入託之私者叱之曰此豈汝等講托地耶聲
色俱厲聞者繼之嘉靖五年致仕特賜馳驛令有司給米四石
歲夫六名及 陛辭上特製詩一首書於籠箋賜之以寵其行
舉朝臣工咸嘆有此奇遇卒贈太子太保謚康敏性好士樂善
雖面折不能容人之過而恕過弗藏故人弗怨之臨事決議能
以二三語折衷靡不服學士石熊峰稱之曰清梗忠實時以爲
實紀云

顏頤壽字天和湖廣岳州府巴陵縣人弘治庚戌進士授寶豐
知縣七年調淇縣知縣十一年擢貴州道監察御史正德二年

陞光祿寺少卿三年陞大理寺右少卿五年陞都察院右僉都御史佐理院事本年守制接喪十年補原職仍理院事十二年陞都察院右副都御史仍理院事十六年陞刑部右侍郎本年陞本部左侍郎嘉靖二年陞南京禮部尚書本年改南京戶部尚書三年改南京吏部尚書四年改都察院左都御史掌院事五年改刑部尚書六年以大獄閑住

李承勛字立卿湖廣嘉魚縣人弘治癸丑舉進士授直隸太湖縣知縣陞南京刑部山東司主事歷山西司員外郎廣西司郎中以憂去正德五年服闋仍補南京工部虞衡司郎中六年陞江西南昌府知府九年陞浙江按察司使十一年丙子進陝西

右布政使十四年轉河南左布政使十五年陞都察院右副都御史巡撫遼東乃修築定遠慶雲古城鎮夷松山柴河六堡堠望百八十一所屯田千五百頃又修中固鐵嶺又蒲河撫順諸城皆濬陞樹木爲阻固東園稍寧進俸一等逾年請告世廟卽位嘉靖二年起南臺轉南京刑部侍郎進尚書六年召入吏部會新進用事從中沮尼道改刑部加太子少保上疏論時事本年冬改兵部尚書兼都察院都御史詳兵部

胡世寧字永清浙江仁和縣人弘治癸丑進士授湖廣德安府推官庚申取陞南京刑部陝西司主事乙丑叙進山東司署員外郎正德二年丁卯進署陝西司郎中戊辰陞廣西太平知府

壬申陞江西按察副使 勅理撫州東鄉兵備嘉靖元年壬午
遷吏部右侍郎聞外艱甲申服闋被 召乙酉秋以兵部左侍
郎徵入 朝是秋得改南京吏部左侍郎丁亥夏五月拜南京
工部尚書辭免所陞俸是秋以左都御史 召道改刑部尚書
用議者言特加太子少保仍左都御史掌院事入見辭免官保
冬暮更刑部尚書戊子正月引疾辭職不允是年因災異陳言
勤 聖學一事恤民任官九事冬十一月轉兵部尚書詳兵部
周倫字伯明直隸蘇州府崑山縣人弘治己未進士授新安知
縣十七年行取擢山東道監察御史上言 孝廟上賓內宮不
宜作佛事及免近邊州縣進香正德元年養病逆瑾以遠限勒

致仕五年補江西道御史疏拯宿弊五事及薦舉廢棄大臣謝遷劉大夏等詔可十一年陞南京大理寺右寺丞十六年陞

大理寺右少卿嘉靖元年轉本寺左少卿本年陞都察院右僉都御史理院事乞假尋丁母憂服闋四年改南京提督江防五年陞本院右副都六年陞南京工部右侍郎本年改兵部右侍郎七年陞兵部左侍郎本年陞南京刑部尚書八年五月改刑部尚書八月履任命侍經筵九月特旨調南京刑部詳南京刑部

京刑部

高友璣字肅政浙江温州府樂清人生有至性母病朝夕湯藥衣不解帶以孝聞舉弘治庚戌進士例得歸省及奉檄赴選途

感異夢覺而驚遂復歸而母疾危克送終盡禮人以爲孝感服
除授南京刑部主事歷員外郎郎中治獄詳明諸司章奏悉資
詳定十六年擢守九江聲稱大起正德元年陞廣西右叅政管
田州府事田故夷方險地土官岑猛者坐與族類構爭削秩

詔以漢官撫之前官懼而逸廣西撫按疏上謂非得優幹局識達
權變之人不可適考績至京遂有是命衆謂夷性叵測多爲危
之遂單車入田境審夷情向背待以懇誠又宣 朝廷德威示
之順逆利害始猛入見猶擁兵自衛久之乃遂款效東身聽命
乃立學訓士置堡伍聯其衆歸被虜男女以數百計田人帖服
竟不煩兵三年事聞 朝廷宥猛且復其官因徙友瓊內地忤

權倖意仍以知府調衛輝郡當衝道民疲於供億一切裁損之
請停黃河役寬負鹽禁衛人以甦五年陞江西左叅政尋轉山
西按察使七年陞陝西右布政使八年擢右副都御史巡撫大
同所至達政體赫赫有聲風采峻整貴倖數見裁抑十年坐是
得旣降二級致仕後起爲兵備郴桂副使丁外艱未赴十四年
以薦起爲山東右叅政十六年轉福建右布政使本年召爲
光祿寺卿嘉靖二年陞南京刑部右侍郎四年轉右都御史總
理漕運江淮數鹽徒出沒爲患請兵討誅渠惡若干人而招徠
其衆革驛傳費宿弊一清六年進南京工部尚書七年改南京
刑部已而召入爲刑部尚書居僅三月餘謝歸平居色溫禮恭

至臨事疑疑操執不渝雖屢蹶而與無所依違嬖姁故資久
後大用既用而不獲久云既致仕以俸入構祠祀二尚書及躬
書院買贍田教高氏子姓及四方來學者朔望謁祠退考業講
學以爲常所居僅蔽廬布衣蔬食終其身蓋恭儉誠樸出於天
性然也卒年八十六贈太子少保謚襄簡

許讚字廷美河南府靈寶縣人吏部尚書襄毅公進子弘治丙
辰進士戊午授大名府推官壬戌徵入拜陝西道監察御史乙
丑以疾歸正德丙寅復起爲御史戊辰父襄毅公入位冢宰以
例改翰林院編脩庚午丁襄毅憂瑾誅起復陞浙江僉事戊寅
陞副使巡視海道己卯改山西提學辛巳陟四川叅政甲申陞

浙江布政使乙酉轉左布政使丁亥陞光祿卿既而陞刑部右侍郎尋爲左侍郎戊子陞本部尚書庚寅改戶部尚書詳內閣王時中字道夫山東萊州府黃縣人弘治庚戌進士授鄆陵知縣闢田勸農興學厚俗振靡剔蠹綏良糾奸逋移來歸飛蝗遍鄰壤而鄆陵獨無頌聲四起旣去立碑以志至今父老有望碑泣者嘗出郊旋風擁馬首不得行時中曰必冤氣也俾隸人尾之旋入蔬圃繞胥井不散召主者根究其故乃少婦外通殺其夫掘井果得屍人以爲神有賄豪專持官司短長虎視一邑時中暴其奸抵之法丁巳選授監察御史督察畿輔馬政明年遭母喪甲子起復正德初逆瑾煽亂毒痛海內時中抗疏極論瑾

卿之識名於屏已而時中巡按宣大見綱紀弛上下玩愒日甚則極意振飭厲厥風楞時劉總督宇瑾私人也嘗爲賊吏所求於時中不從宇旣憾之又承瑾言矯詔繫逮令荷重枷露立三法司之前三日數跽且殆閣臣力援乃釋械遣戍鐵嶺衛庚午瑾伏誅用薦爲四川按察副使時廖麻子鄢老人兵起震蕩三川總制尚書彭公澤檄備重慶保順諸路時中據江爲險增啤浚隍繕甲勵矢申飭禁令嚴遣間諜寇卒不敢東向百姓得不及難事平策勲受白金文綺之賜乙亥遷湖廣按察使清冒籍折僞券解結疏滯楚民安之雅不喜奢麗僚友設燕席過爲繁縟命撤其三之一乃就坐事之有矩押節制類此丁丑陞

右僉都御史巡撫寧夏上疏言惠寧堡比去鹽池不甚遠虜騎之衝請於此築城爲備置將設兵列壘臺使烽堠聯絡足以扞因鎮城遠爲靈州聲援又言今將佐貪而愛身士卒悍不用命尺籍不登常額而庸係私門者衆帶甲控弦者無幾矧復扣縮歲支辦納月金是冗食無補空名而鮮實也且士卒提馘不賞死事不以名聞戰敗則偏置將佐於事何益又請靈州建學置師檢武臣子弟行伍之異秀羣肄其中大發丁夫鑿漢唐故渠自是數百里內畝歲登數金巡花馬池還謀者報虜數千騎直下時中曰賊遠來疲矣可速戰乃戎服擄鞍夜馳五十里比時至與武營與虜遇指麾諸將分布士卒鼓譟而進斬首三千餘

級時 武皇在榆林捷奏大悅 賜蟒服玉繒環旌其功辛巳

召爲右副都御史入佐院事因以覲省請 特命給驛歸益異

數云旋聞父芝峰翁喪嘉靖甲申服闋以舊官起慶王台法居

西夏所爲多不法撫臣列上罪狀 上命時中往按之盡得其

情奏廢爲庶人進兵部右侍郎未幾遷左 上出 獻皇帝宸

翰賜時中丙戌陞尚書奉 勅提督團營侍 經筵乃甄才勇

汰懦弱隨器授事無不任者丁亥 賜恩紀合春堂集 御製

五箴註文獻通考諸書秋鄭村壩有盜嘯聚數百人剽掠鄉邑

守臣輒張皇請兵時中曰無以爲也此亡命挾惡少竊發爾檄

武帥乘賊不意以偏師宵濟遂大破之擒首惡數人餘脅從咸

縱釋歸戊子通州守備鄔佑者被論因波及時中卽引嫌請避

位辛卯事白驛 召復兵部三辭乃就列 上幸無逸殿時中

進講詩豳風一章冬例處大辟 上重念刑獄宣示輔臣曰王

某性資詳慎可刑部尚書時中感知遇原情考法平反若干人

壬辰秋滿 賜寶錘羊酒進授資政大夫星變條上六事且引

咎陳退 上皆優詔答之癸巳馮御史恩疏列輔臣六曹長貳

過爲軒輊 上大震赫令械繫詔獄疏中謂時中爲具臣時中

笑曰具臣亦不易得嫉之者欲坐上言大臣德敦律時中言御

史糾舉職也何異卒處以不死而時中遂落職人臆時中雅量

云歸後謝賓客格口不談世事課子弟讀書時作小詩自況丙

申 詔許致仕時中自以侍 三朝歷中外四十年晚得領骸
骨休居林下保茲終始從容與鄉人觴詠爲樂壬寅元夕坐燈
棚下觀絲兒羣嬉猶爲酌酒爲歡十六昧旦遂死先數日家人
隱約見車蓋節幢甚都若迎送狀是日寥廓中聞鼓吹音云年
七十有七流覽古今讐史考經嘗推訂左氏公穀異同成一家
言所著有奏議十卷海山集若干卷宦轍聯句一卷藏於家
聶賢字承之四川重慶府長壽縣人弘治庚戌進士五年授武
昌知縣七年調麻城十一年擢山西道監察御史十八年巡按
廣東賢奏地方盜賊事 上持賢疏與輔臣劉健等議須加緊
鎮巡官劉健對曰昨已擬切責正德元年避逆瑾養病五年瑾

敗起雲南副使七年以憂去九年起補湖廣十二年陞湖廣按察使十四年陞湖廣右布政使十六年陞河南左布政本年陞右副都御史提督南贛汀漳等處軍務采羣議以懲州十一圖清遠九圖立大埔縣隸潮州府又以潮陽縣惠安等都惠州海豐城龍溪都臨海環山去縣治遠盜賊竊發設惠來縣於洋尾隸潮州買麻地魚塘收利以資軍儲嘉靖四年改南院操江本年陞右都御史掌南院事五年陞南京刑部尚書本年改都察院左都御史掌院事時逃軍李福達以妖術誘或洛川民邵進祿惠愛令聚眾俟發事覺捕急聚眾反官兵捕獲供福達首謀達知竄入匠籍納為指揮往來武定侯郭勛家勛囑御史不從

問擬謀反賢上言福達之罪允當勛爲勲戚乃交通逆賊納賄
行賄請併治之得 旨福達如擬令勛對狀六年以大獄革職
十一年起工部尚書尋改左都御史俱未任十二年起刑部尚
書十四年致仕二十年卒贈太子少保謚恭襄